

**“РЎЙХАТГА ОЛИНГАН”**

Ўзбекистон Республикаси

Марказий банки

2022 йил 24 декабр

89-сон,

2023 йил 5 сентябр

89/1-сон,

2024 йил 6 феврал

89/2-сон

2024 йил 5 апрел

89/3-сон

Ўзбекистон Республикаси

Марказий банк раисининг

биринчи ўринбосари

имзо **Н.Н.Сайдуллаев**

**“SMART BANK” АКЦИЯДОРЛИК ЖАМИЯТИНИНГ  
УСТАВИ**

**“ТАСДИҚЛАНГАН”**

“Smart bank” акциядорлик жамияти

Ягона таъсисчисининг

2022 йил 26 августдаги

1-сонли таъсис йиғилиш баённомаси

Ягона акциядорнинг

2023 йил 25 августдаги

08/1-сонли қарори

Ягона акциядорнинг

2023 йил 18 декабрдаги

08/2-сонли қарори

Ягона акциядорнинг

2024 йил 29 мартдаги

03/1-сонли қарори

Банк Кузатув кенгаши раиси

имзо **Ж.Х.Хайдаров**

## 1. УМУМИЙ ҚОИДАЛАР

1. “Smart bank” акциядорлик жамияти (кейинги ўринларда “Банк” деб аталади) тижорат ташкилоти бўлиб, Ўзбекистон Республикасининг “Банклар ва банк фаолияти тўғрисида”ги, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунлари ва бошқа қонунларга мувофиқ “LEADER FINANCE” МЧЖ (кейинги ўринларда “Ягона акциядор” деб юритилади)нинг 100 фоизлик улуши асосида ташкил этилган.

2. Банк акциядорлик жамияти шаклида ташкил этилиб, банк хизматлари сифатини, тезкорлигини ва қулайлигини оширишга қаратилган рақамли банк хизматларини кўрсатувчи банк ҳисобланади.

3. Банк ўзининг ташкилий-ҳуқуқий шакли кўрсатилган тўлиқ фирма номига ва қисқартирилган фирма номига эга.

Банкнинг фирма номи:

давлат тилида лотин ёзувида: тўлиқ – “Smart bank” aksiyadorlik jamiyati; қисқартирилган номи – “Smart bank” AJ;

давлат тилида кирилл ёзувида: тўлиқ – “Smart bank” акциядорлик жамияти, қисқартирилган номи – “Smart bank” АЖ;

рус тилида: тўлиқ – Акционерное общество “Smart bank”, қисқартирилган номи – АО “Smart bank”;

инглиз тилида: тўлиқ - Joint stock company “Smart bank”, қисқартирилган номи – JSC “Smart bank”.

Банк ўз фирма номидан мутлақ фойдаланиш ҳуқуқига эга.

4. Банк ўзининг фирма номи давлат тилида тўлиқ ёзилган ҳамда жойлашган ери кўрсатилган юмалоқ муҳрга эга бўлади. Муҳрда бир вақтнинг ўзида фирманинг номи бошқа исталган тилда ҳам кўрсатилиши мумкин.

Банк ўзининг номи ёзилган штамп ва бланкаларга, ўз тимсолига, шунингдек белгиланган тартибда рўйхатдан ўтказилган товар белгисига ҳамда фуқаролик муомаласи иштирокчиларининг, товарларнинг, ишларнинг ва хизматларнинг хусусий аломатларини акс эттирувчи бошқа воситаларга эга бўлишга ҳақли.

5. Банк юридик шахс бўлиб, у ўз мустақил балансида ҳисобга олинадиган алоҳида мол -мулкка, шу жумладан ўзининг устав фондига (устав капиталига) берилган мол -мулкка эга бўлади, ўз номидан мулккий ва шахсий номулкий ҳуқуқларни олиши ҳамда амалга ошириши, зиммасига мажбуриятлар олиши, судда даъвогар ва жавобгар бўлиши мумкин.

6. Банк белгиланган тартибда Ўзбекистон Республикаси ҳудудида юридик шахс ҳуқуқини бермаган ҳолда банк хизматлари марказларини ташкил қилишга ҳақли ҳамда қонун ҳужжатларида кўзда тутилган ва мазкур Уставда белгиланган қоидалар доирасида уларга ҳуқуқлар бериши мумкин.

Банк Ўзбекистон Республикаси Марказий банкининг рухсати билан Ўзбекистон Республикасидан ташқарида шўъба банклар очиши ва филиаллар ташкил этиши, ваколатхоналар очиши, банкларнинг капиталида иштирок

этиши, шу жумладан чет эл банкларини ташкил этишда иштирок этиши мумкин.

Банк қонунчиликда белгиланган тартибда банклар гуруҳининг иштирокчиси бўлиши мумкин.

7. Банк ўз мажбуриятлари юзасидан ўзига тегишли барча мол-мулк билан жавобгар бўлади. Банк Ягона акциядорнинг мажбуриятлари юзасидан жавобгар бўлмайди.

Ягона акциядор Банкнинг мажбуриятлари юзасидан жавобгар бўлмайди ва унинг фаолияти билан боғлиқ зарарларнинг ўрнини ўзларига тегишли акциялар қиймати доирасида қоплаш таваккалчилигини ўз зиммасига олади.

Банк давлатнинг мажбуриятлари бўйича, давлат эса банкнинг мажбуриятлари бўйича жавоб бермайди, бундан банкнинг ёки давлатнинг ўзи бундай мажбуриятларни зиммасига олиш ҳоллари мустасно.

8. Банк давлат рўйхатидан ўтказилган пайтдан эътиборан юридик шахс мақомига эга бўлади ва ўз фаолиятини Ўзбекистон Республикасининг Марказий банки (бундан буён матнда “Марказий банк” деб юритилади) томонидан берилган лицензия асосида амалга оширади. Банк чекланмаган муддатга тузилади.

9. Банк Ўзбекистон Республикасининг банк тизими таркибига кириб, ўз фаолиятида қонун ҳужжатлари ва мазкур Уставга амал қилади.

10. Банкнинг жойлашган ери (почта манзили): 100011, Ўзбекистон Республикаси, Тошкент шаҳри, Шайхонтоҳур тумани, Ботир Зокиров кўчаси, 2а-уй. Электрон почта манзил: [office@smartbank.uz](mailto:office@smartbank.uz), веб манзил: [www.smartbank.uz](http://www.smartbank.uz).

## **2. БАНКНИНГ АСОСИЙ МАҚСАДИ, МАҚСАД ВА ВАЗИФАЛАРИ**

11. Банк ўз фаолиятини тижорат асосида амалга оширади.

Банкнинг асосий мақсади иқтисодиётнинг барча соҳаларида фаолият юритувчи юридик ва жисмоний шахсларга амалдаги қонунчиликка мувофиқ кенг кўламдаги сифатли ва замонавий банк хизматларини кўрсатиш ва фойда олишдан иборат.

12. Банкнинг мақсад ва вазифалари қуйидагилар ҳисобланади:

рақамли банкингни амалиётига асосланган ҳолда банк хизматларининг янги механизмлари ва турларини жорий қилиш;

аҳолига ўз бизнесини юритишда янада қулайликлар яратиш имкониятлари вужудга келтириш;

ҳалқаро молия институтлари ва етакчи хорижий банкларнинг имтиёзли кредитлари, инвестициялари ва грантларини жалб этиб, кейинчалик иқтисодиётнинг барча соҳаларида фаолият юритувчи хўжалик юритувчи субъектлар ҳамда жисмоний шахсларни ана шу маблағлар ҳисобига қайта молиялаштириш;

IT технологиялардан фойдаланиб инсон омилини максимал камайтирган ҳолда замонавий рақамли молиявий хизматларни кенг жорий қилиш;

24/7 режимида (куну-тун) ишлайдиган онлайн, жумладан чакана ва корпоратив банк хизматларини кўрсатиш;

скоринг таҳлиллари асосида фуқароларга “онлайн” молиявий хизматлар кўрсатиш;

фуқаролар томонидан бугунги кунда талаб юқори бўлган қарз ва микроқарз хизматини кенг жорий қилиш;

тадбиркорлик субъектларига тайёр ва стандарт молиявий хизматлар пакетини тақдим этиш;

ўз бизнесини бошлаётган ва фаолият юритаётган тадбиркорларга онлайн кредитлар ажратиш орқали тадбиркорлик ташаббусларни ҳар томонлама қўллаб-қувватлаш мақсадлари қамраб олинган.

### **3. БАНК ОПЕРАЦИЯЛАРИ**

13. Банк амалдаги қонун ҳужжатларига мувофиқ қуйидаги молиявий операцияларни амалга оширади:

пул маблағларини омонатларга (депозитларга) жалб этиш;

тўловларни амалга ошириш, шу жумладан банк ҳисобварақларини очмасдан амалга ошириш;

жисмоний ва юридик шахсларнинг банк ҳисобварақларини, шу жумладан банкларнинг вакиллик ҳисобварақларини очиш ҳамда юритиш;

кредитларни уларнинг қайтарилиши, фоизлилиги ва муддатлилиги шарти билан ўз номидан ўзининг маблағлари ҳамда жалб этилган маблағлар ҳисобидан бериш;

чет эл валютаси билан нақд ва нақдсиз шакллардаги операциялар;

жисмоний ёки юридик шахс билан тузилган шартнома бўйича мол-мулкни ишончли бошқариш;

инкассация ва касса хизматларини кўрсатиш;

учинчи шахслар номидан уларнинг мажбуриятлари бажарилишини назарда тутувчи кафолатлар бериш ва бошқа мажбуриятларни қабул қилиш;

учинчи шахслардан пул шаклидаги мажбуриятларнинг бажарилишини талаб қилиш ҳуқуқини олиш (факторинг);

қимматли қоғозларни чиқариш, харид қилиш, сотиш, уларнинг ҳисобини юритиш ва уларни сақлаш, мижоз билан тузилган шартномага биноан қимматли қоғозларни бошқариш, улар билан бошқа операцияларни бажариш;

аффинланган қимматбаҳо металллар сотиб олиш ва сотиш, шу жумладан металлларни масбул сақлаш ҳисобварақларини ҳамда металлларнинг эгасизлантирилган (жисмоний бўлмаган) ҳисобварақларини юритиш;

қимматбаҳо металллардан ясалган тангаларни сотиб олиш ва сотиш;

ҳосилавий молия воситалари (деривативлар) билан операцияларни амалга ошириш;

ҳужжатларни ёки қимматликларни сақлаш учун махсус биноларни ёки уларнинг ичидаги сейфларни ижарага бериш;

лизинг бериш;

қонун ҳужжатларида назарда тутилган шаклларда қарзлар бериш;  
молиявий операциялар билан боғлиқ маслаҳат хизматлари кўрсатиш;  
активлар мажмуини (портфелини) бошқариш;  
электрон пулларни чиқариш, улардан фойдаланиш ва тўлаш;  
банк карталарини бериш ва тўловларга ишлов бериш, банк карталарига бошқа ташкилотлар, жумладан бошқа молия институтлари билан биргаликда хизмат кўрсатиш.

Банк Ўзбекистон Республикаси “Банклар ва банк фаолияти тўғрисида”ги қонунига мувофиқ бошқа молиявий операцияларни амалга оширади ҳамда банк хизматларини кўрсатади.

Банк хизматлар ва операцияларнинг айрим турларини шартнома асосида ва узлуксиз асосда амалга ошириш учун учинчи тарафга Марказий банкнинг рухсатномаси олинганидан ва Марказий банк томонидан белгиланган талабларга мувофиқ аутсорсингга топшириш ҳуқуқига эгадир. Банк молиявий операцияларни амалга ошириш билан боғлиқ қарорлар қабул қилишда мустақилдир.

14. Банк Марказий банкда, бошқа ваколатли резидент ва норезидент банклар ҳамда кредит ташкилотларида, қонунчилик ҳужжатларида белгиланган тартибда пул маблағларини сақлаш ва ўз операцияларини амалга ошириш учун вакиллик ҳисобварағини очади.

#### **4. БАНКНИНГ ҲУҚУҚ ВА МАЖБУРИЯТЛАРИ**

15. Банк қуйидаги ҳуқуқларга эга:

ўзининг умумий манфаатларини ҳимоя қилиш ҳамда биргаликдаги дастурларни амалга ошириш мақсадида уюшмалар ва бошқа бирлашмалар тузишга;

қонун ҳужжатларида белгиланган тартибда Ўзбекистон Республикасида банк хизматлари марказлари (офислари)ни ташкил этиш, ваколатхоналар очишга;

чет элда шўъба банклар очиш ва филиаллар ташкил этиш, банкларнинг капиталида иштирок этиш, шу жумладан чет эл банкларини ташкил этишда иштирок этишга;

шартнома асосида пул маблағларини депозитлар, кредитлар шаклида банклардан жалб этиши ва уларга жойлаштириши, ҳисоб-китоб марказлари ва вакиллик ҳисобварақлари орқали ҳисоб-китобларни амалга ошириши ҳамда лицензияда назарда тутилган бошқа молиявий операцияларни бажаришга;

мижозлар ўртасидаги муносабатларни шартномалар асосида амалга ошириш, шартномалар шартларини, кредитлар, депозитлар бўйича фоиз ставкалари, банк операцияларига оид воситачилик ҳақи миқдорини мустақил белгилашга;

банк хизматлари ва операцияларини амалга ошириш шартлари ва тартибини тасдиқлашга;

банк хизматлари ва операцияларини шартнома асосида ва узлуксиз

асосда амалга ошириш учун учинчи тарафга аутсорсинга топширишга;

банк тасарруфида қоладиган соф фойда ҳамда бошқа маблағлар ҳисобидан захиралар ва фондлар ташкил этишга;

қимматли қоғозлар бозорида профессионал фаолиятни амалга оширишга;

молия ва хўжалик органларида корхоналар ва ташкилотлар манфаатларини уларнинг ишончномалари бўйича ифодалашга;

таъминланмаган кредит (ишончга асосланган кредит) бериш тўғрисида қарор қабул қилишга ҳақли.

Банк қуйидаги юридик шахсларни ташкил этиш ва (ёки) юридик шахсларнинг устав фондларидаги (устав капиталларидаги) улушларни ёки акцияларни олиш мумкин:

кредит, суғурта ва лизинг операцияларини профессионал асосда амалга оширувчи юридик шахслар;

молия бозори инфратузилмасининг бир қисми бўлган ёки банкларга ахборот ва маслаҳат хизматларини кўрсатувчи юридик шахслар;

қимматли қоғозлар бозорида профессионал фаолиятни амалга оширувчи юридик шахслар;

банкнинг кафолати остида қимматли қоғозларни чиқариш ва жойлаштириш мақсадида мазкур банкнинг хорижда ташкил этиладиган шўба ташкилотлари;

фақат инкассация фаолияти билан шуғулланувчи юридик шахслар;

банк операциялари бўйича ҳисоб-китоблар, шу жумладан банк карталари билан операцияларга доир ҳисоб-китоблар иштирокчилари ўртасида ўзаро боғлиқлигини таъминлаш бўйича хизматлар кўрсатувчи юридик шахслар;

фонд ва валюта биржалари;

кредит бюrolари;

қимматли қоғозларнинг иккиламчи бозорига жойлаштирилган акцияларнинг йигирма фоизидан ортиқ бўлмаган миқдорда фонд биржаси листингига киритилган акциядорлик жамиятлари.

16. Банк бевосита ишлаб чиқариш, савдо, суғурта фаолияти ҳамда Ўзбекистон Республикаси “Банклар ва банк фаолияти тўғрисида”ги Қонунида назарда тутилган молиявий операцияларни амалга ошириш билан боғлиқ бўлмаган бошқа фаолият билан шуғулланишга ҳақли эмас. Ушбу чеклов қуйидаги ҳолларга нисбатан татбиқ этилмайди ва банк қуйидагиларни амалга ошириши мумкин:

банк карталари асосида нақд пулсиз ҳисоб-китоблар тизимларида фойдаланиладиган ихтисослаштирилган ускунани ва унга доир дастурий таъминотни сотиш ёки ижарага беришга;

ўз активларини сотишга;

чек дафтарчаларини чиқариш, реализация қилиш ва тарқатишга;

суғурта ташкилотлари бўлган Ўзбекистон Республикаси резидентлари номидан суғурта шартномаси тузилишини ташкил этиш бўйича фаолиятни

амалга оширишга;

банк ўзи муассис бўлган юридик шахсларга ўз мол-мулкани мулкрий ижара (аренда) шартномасига мувофиқ ижарага беришга.

17. Банк қуйидагиларга мажбурдир:

Марказий банк томонидан белгиланадиган пруденциал нормативларга риоя этиш;

Марказий банк томонидан белгиланган мажбурий захиралаш талабларини бажариш;

Марказий банк томонидан белгиланган ички назоратга ҳамда таваккалчиликларни бошқариш тизимига доир талабларга риоя этиши;

кредит ва лизинг операциялари бўйича эҳтимол тутилган зарарларни қоплаш учун Марказий банк томонидан белгиланган тартибда ва миқдорларда захиралар ташкил этиш;

гаровнинг (шу жумладан мол - мулк шаклидаги гаровнинг), бериладиган кафолатлар, кафилликлар ва мажбуриятларнинг етарлилигини ҳисобга оладиган ҳамда бериладиган кредитлар таъминланишининг ички норматив тартибини белгилаш;

ўз фаолияти тўғрисидаги ахборотни қонун ҳужжатларида белгиланган тартибда ошкор этиш;

банкда ички аудит хизмати мавжуд бўлишини таъминлаш;

жинойй фаолиятдан олинган даромадларни легаллаштиришга, терроризмни молиялаштиришга ва оммавий қирғин қуролини тарқатишни молиялаштиришга қарши курашиш тўғрисидаги қонун ҳужжатлари талабларига риоя этиш;

қонун ҳужжатларига мувофиқ банк сирини ёки бошқа сирни ташкил этадиган маълумотларнинг ошкор этилмаслигини таъминлаш.

18. Банк Ўзбекистон Республикаси “Банклар ва банк фаолияти тўғрисида”ги Қонунига мувофиқ бошқа ҳуқуқ ҳамда мажбуриятларга ҳам эга бўлиши мумкин.

## **5. БАНКНИНГ УСТАВ КАПИТАЛИ**

19. Банкнинг устав капитали Ўзбекистон Республикаси миллий валютасида шакллантирилади ҳамда банк муассиси ва Ягона акциядори киритган пул маблағларидан ёки давлатнинг қимматли қоғозларидан ташкил топади, бундан қуйидаги ҳоллар мустасно:

банк акцияларини банкнинг кредиторлари орасида жойлаштириш ва банкнинг кредиторлар олдидаги пул мажбуриятлари бўйича ҳар қандай ҳуқуқларини (талабларини) ҳисобга олиш йўли билан уларнинг ҳақини тўлаш;

қимматли қоғозларни банк акцияларига айирбошлаш;

банкнинг жойлаштирилган бир турдаги акцияларини бошқа турдаги акцияларига алмаштириш.

Банкнинг устав капиталини шакллантириш учун кредитга, гаровга олинган маблағлардан, шунингдек мажбурият юклатилган бошқа маблағлардан

фойдаланишга йўл қўйилмайди.

20. Банк оддий акцияларни жойлаштириши шарт, шунингдек имтиёзли акцияларни жойлаштиришга ҳақли.

21. Банкнинг устав капитали 350 000 000 000 (Уч юз эллик миллиард) сўмни ташкил қилади ва ҳар бирининг номинал қиймати 1 000 (Бир минг) сўм бўлган 350 000 000 (Уч юз эллик миллион) дона эгасининг номи ёзилган оддий акциялардан иборат.

Банк устав капиталини ошириш мақсадида қўшимча эълон қилинган акцияларнинг умумий қиймати 150 000 000 000 (Бир юз эллик миллиард) сўмлик ҳар бирининг номинал қиймати 1 000 (Бир минг) сўм бўлган 150 000 000 (Бир юз эллик миллион) дона эгасининг номи ёзилган оддий акциялардан иборат.

22. Банкнинг устав капиталини кўпайтириш қонун ҳужжатларида ва мазкур Уставда белгиланган тартибда амалга оширилади.

Банкнинг устав капитали қўшимча акцияларни жойлаштириш йўли билан кўпайтирилиши мумкин.

Қўшимча акциялар Банк томонидан ушбу Уставда белгиланган эълон қилинган акциялар сони доирасидагина жойлаштирилади.

Банкнинг устав капиталини кўпайтириш тўғрисидаги ва Банк Уставига тегишли ўзгартишлар киритиш ҳақидаги қарорлар Ягона акциядор томонидан қабул қилинади.

Банкнинг устав капиталини қўшимча акцияларни жойлаштириш йўли билан кўпайтириш тўғрисидаги қарорда жойлаштириладиган қўшимча оддий акцияларнинг ва имтиёзли акцияларнинг умумий қиймати, сони, тури, номинал қиймати, жойлаштириш тартиби, усули, акциялар учун тўлов тартиби, уларни жойлаштириш муддатлари ҳамда шартлари белгиланган бўлиши керак.

Қўшимча чиқарилган акциялар бозор қийматида, лекин номинал қийматидан кам бўлмаган қийматда жойлаштирилади.

Банкнинг устав капиталини кўпайтириш жойлаштирилган қўшимча акцияларнинг номинал қиймати миқдорида рўйхатдан ўтказилади. Бунда Банк Уставида кўрсатилган, эълон қилинган муайян тоифа ва турдаги акцияларнинг сони ушбу тоифа ва турдаги жойлаштирилган қўшимча акцияларнинг сонига камайтирилиши керак.

Банк устав капиталини қўшимча акцияларни жойлаштириш йўли билан кўпайтириш қонунчиликда белгиланган тартибда жалб қилинган инвестициялар, банкнинг ўз капитали ва ҳисобланган дивидендлар ҳисобидан амалга оширилиши мумкин.

Банк устав капиталини унинг ўз капитали ҳисобидан қўшимча акцияларни жойлаштириш йўли билан кўпайтиришда бу акциялар Ягона акциядор эгалигига ўтади. Банк устав капитали кўпайтирилиши натижасида кўпайтириш суммасининг битта акциянинг номинал қийматига мувофиқлиги таъминланмайдиган бўлса, банк устав капиталини кўпайтиришга йўл қўйилмайди.



23. Банкнинг устав капитали акцияларнинг номинал қийматини камайтириш ёки умумий сонини қисқартириш йўли билан, шу жумладан акцияларнинг бир қисмини кейинчалик бекор қилган ҳолда Банк томонидан акцияларни олиш йўли билан камайтирилиши мумкин.

Банк ўз акцияларини сотиб олиш учун Марказий банкнинг дастлабки рухсатномасини олиши шарт. Банк томонидан сотиб олинadиган ўз акцияларининг суммаси Банк устав капиталининг ўн фоизидан ошиши мумкин эмас.

Банк устав капиталини камайтиришга, агар бунинг натижасида унинг миқдори Банк устав капиталининг мазкур Уставдаги тегишли ўзгартишларни давлат рўйхатидан ўтказиш санасида аниқланадиган, қонун ҳужжатларида белгиланган энг кам миқдоридан камайиб кетса, ҳақли эмас.

Банкнинг устав капиталини камайтириш тўғрисидаги ва Банк Уставига тегишли ўзгартишлар киритиш ҳақидаги қарорлар Ягона акциядор томонидан қабул қилинади.

Банк устав капиталини камайтириш тўғрисида қарор қабул қилган вақтда Ягона акциядор устав капиталини камайтириш сабабларини кўрсатади ва уни камайтириш тартибини белгилайди.

24. Банк ўзи чиқараётган акцияларга уларни оммавий жойлаштириш йўли билан қонун ҳужжатлари талабларини ҳисобга олган ҳолда очик обуна ўтказишга ёки уларни хусусий жойлаштириш йўли билан ёпиқ обуна ўтказишга ҳақли.

Банк томонидан акцияларни ва акцияларга айирбошланадиган қимматли қоғозларни жойлаштириш усуллари (очик ёки ёпиқ обуна) Ягона акциядорнинг қарори билан белгиланади. Банк акцияларини ва акцияларга айирбошланадиган қимматли қоғозларни жойлаштириш услуги тўғрисида кўрсатма бўлмаса, жойлаштириш фақатгина очик обуна йўли билан амалга оширилиши мумкин.

Жойлаштирилаётган акцияларнинг сони акцияларни чиқариш тўғрисидаги қарорда кўрсатилган миқдордан кўп бўлмаслиги лозим.

Банк томонидан кўшимча акцияларни ва бошқа эмиссиявий қимматли қоғозларини жойлаштириш муддати уларнинг чиқарилиши давлат рўйхатидан ўтказилган пайтдан бошлаб бир йилдан ошмаслиги керак.

## **6. БАНК ЯГОНА АКЦИЯДОРНИНГ ҲУҚУҚ ВА МАЖБУРИЯТЛАРИ**

25. Банкнинг Ягона акциядори қуйидаги ҳуқуқларга эга:

акциядорлар реестрига киритилиши;

депо ҳисобварағидан ўзига тааллуқли кўчирма олиш;

Банк фойдасини тақсимлаш ҳамда фойданинг бир қисмини дивидендлар тарзида олиш;

Банк тугатилган тақдирда ўзига тегишли улушга мувофиқ мол-мулкнинг бир қисмини олиш;

Ягона акциядор ваколатига кирадиган масалалар бўйича қарор қабул қилиш орқали Банкни бошқаришда иштирок этиш;

Банкнинг молия-хўжалик фаолияти натижалари тўғрисида тўлиқ ва ишончли ахборотни белгиланган тартибда олиш;  
олган дивидендини эркин тасарруф этиш;  
қимматли қоғозлар бозорини тартибга солиш бўйича ваколатли давлат органида, шунингдек судда ўз ҳуқуқларини ҳимоя қилиш;  
ўзига етказилган зарарнинг ўрни қопланишини белгиланган тартибда талаб қилиш;  
ўз манфаатларини ифодалаш ва ҳимоя қилиш мақсадида уюшмаларга ва бошқа нодавлат нотижорат ташкилотларига бирлашиш;  
қимматли қоғозларни олишда зарар кўриш, шу жумладан бой берилган фойда эҳтимоли билан боғлиқ таваккалчиликларни суғурта қилиш;  
Банк Кузатув кенгаши мажлисини чақириш ҳамда Банк бошқарув органлари ва Банк назорат органи аъзолигига номзодларни кўрсатиш;  
Ягона акциядор қонун ҳужжатларига ва Банк Уставига мувофиқ бошқа ҳуқуқларга ҳам эга бўлиши мумкин.

26. Ягона акциядор қуйидагиларга мажбур:

ўз акцияларига бўлган ҳуқуқларини ҳисобга олиш бўйича хизматлар кўрсатувчи депозитарийни ва (ёки) инвестиция воситачисини ўзига оид маълумотлардаги ўзгаришлар ҳақида ўз вақтида хабардор қилиш;

банк сирини, хизмат, тижорат ва бошқа сирни ташкил этувчи ахборотни ва қонун билан кўриқланадиган бошқа махфий маълумотларни ошкор этмаслик;

Ўзбекистон Республикасининг амалдаги қонун ҳужжатлари ва ушбу Уставда назарда тутилган бошқа мажбуриятларни бажариш.

27. Банк акцияларига эгалик қилишга доир рухсатнома ва чеклов Ўзбекистон Республикаси “Банклар ва банк фаолияти тўғрисида”ги қонун ва Марказий банкнинг меъёрий-ҳуқуқий ҳужжатларига мувофиқ амалга оширилади.

## **7. БАНК СОФ ФОЙДАСИНИ ТАҚСИМЛАШ ВА ЗАРАРНИ ҚОПЛАШ ҲАМДА БАНКНИНГ ФОНДЛАРИ ВА СОФ АКТИВЛАРИ**

28. Банк фойдаси ҳисобидан барча солиқ ва мажбурий ажратмалар тўлангандан сўнг қоладиган қисми соф фойда ҳисобланади ва у Ягона акциядор қарорига мувофиқ белгиланган тартибда тақсимланади. Банкнинг соф фойдасидан маблағлар захира фондлар ташкил этишга, дивидендлар тўлашга ҳамда бошқа мақсадларга йўналтирилиши мумкин.

Банк зарарлари қонунчиликда белгиланган тартибда захира фонди ҳисобидан қопланади.

29. Банкда Банк устав капиталининг 15 (Ўн беш) фоизидан кам бўлмаган миқдорда захира фонди ташкил этилади.

Банкнинг захира фонди белгиланган миқдорга етгунига қадар ҳар йили соф фойданинг 5 (Беш) фоизидан кам бўлмаган миқдорда мажбурий ажратмалар ўтказиш орқали шакллантирилади.

Бошқа маблағлар мавжуд бўлмаган тақдирда, Банкнинг захира фонди Банкнинг зарарлари ўрнини қоплаш, Банкнинг корпоратив облигацияларини муомаладан чиқариш, имтиёзли акциялар бўйича дивидендлар тўлаш ва Банкнинг акцияларини қайтариб сотиб олиш учун мўлжалланади. Банкнинг захира фондидан бошқа мақсадлар учун фойдаланиш мумкин эмас.

30. Банк қонун ҳужжатларига мувофиқ бошқа фондларни ҳам ташкил этишга ҳақли.

Ташкил этиладиган фондларнинг маблағлари қонун ҳужжатларига мувофиқ Банкнинг Кузатув кенгаши қарорига асосан ишлатилади.

31. Банк соф активларининг қиймати бухгалтерия ҳисоби маълумотлари бўйича, Банк активлари ва мажбуриятларининг умумий суммаси ўртасидаги фарқ сифатида аниқланади.

## **8. БАНК АКЦИЯЛАРИНИНГ ТУРЛАРИ ВА УЛАР БЎЙИЧА ДИВИДЕНДЛАР ТЎЛАШ ТАРТИБИ**

32. Банкнинг акциялари эгасининг номи ёзилган эмиссиявий қимматли қоғозлар бўлиб, улар турига кўра оддий акциялардан иборат. Банк акцияси бўлинмасдир.

33. Оддий акциялар овоз берувчи акциялар бўлиб, улар ўз эгасига дивидендлар олиш, банкни бошқаришда иштирок этиш ҳуқуқини беради.

Оддий акцияларнинг эгалари бўлган акциядорлар Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонунига ва мазкур Уставга мувофиқ акциядорларнинг умумий йиғилишида мазкур йиғилиш ваколатига кирадиган барча масалалар бўйича овоз бериш ҳуқуқи билан иштирок этиши мумкин, шунингдек дивидендлар олиш, банк тугатилган тақдирда эса, ўзларига тегишли улушга мувофиқ банк мол-мулкининг бир қисмини олиш ҳуқуқга эга.

34. Банк қонун ҳужжатларига ва мазкур Уставга мувофиқ корпоратив облигацияларни ва бошқа қимматли қоғозларни чиқаришга ҳамда жойлаштиришга ҳақли. Корпоратив облигациялар ва бошқа қимматли қоғозларга ҳақ тўлаш пул маблағлари билан амалга оширилади. Банкнинг корпоратив облигациялари ва бошқа қимматли қоғозлари Банк Кузатув кенгашининг қарорига асосан қонунчиликда белгиланган тартибда чиқарилади ва жойлаштирилади.

35. Дивиденд банк соф фойдасининг акциядорлар ўртасида тақсимланадиган қисмидир. Дивиденд Ягона акциядорнинг қарорига кўра пул маблағлари ёки бошқа қонуний тўлов воситалари ёхуд Банкнинг қимматли қоғозлари билан тўланиши мумкин.

36. Банк молиявий йилнинг биринчи чораги, ярим йиллиги, тўққиз ойи натижаларига кўра ва (ёки) молиявий йил натижаларига кўра, агар Ўзбекистон Республикаси “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги, “Банклар ва банк фаолияти тўғрисида”ги қонунлари ва мазкур Уставда бошқача қоида белгиланмаган бўлса,

жойлаштирилган акциялар бўйича дивидендлар тўлаш тўғрисида қарор қабул қилишга ҳақли.

Банкнинг молиявий йилнинг биринчи чораги, ярим йиллиги ва тўққиз оии натижаларига кўра дивидендлар тўлаш тўғрисидаги қарори тегишли давр тугагандан кейин уч ой ичида қабул қилиниши мумкин.

37. Акцияларнинг ҳар бир тури бўйича дивидендлар тўлаш, дивиденднинг миқдори, уни тўлаш шакли ва тартиби тўғрисидаги қарор Банк Кузатув кенгашининг тавсияси, молиявий ҳисоботнинг ишончлилиги ҳақида аудиторлик хулосаси мавжуд бўлган тақдирда, молиявий ҳисобот маълумотлари асосида Ягона акциядор томонидан қабул қилинади. Дивидендларнинг миқдори Банк Кузатув кенгаши томонидан тавсия қилинган миқдордан кўп бўлиши мумкин эмас.

Дивидендлар тўлаш тўғрисидаги қарорда дивидендлар тўлаш бошланадиган ва тугалланадиган саналар кўрсатилган бўлиши лозим.

38. Дивидендлар Банк тасарруфида қоладиган соф фойдадан ва (ёки) ўтган йилларнинг тақсимланмаган фойдасидан амалдаги қонун ҳужжатларига мувофиқ тўланади.

39. Банк қуйидаги ҳолларда дивидендлар тўлаш тўғрисида қарор қабул қилишга ҳамда дивидендлар тўлашга ҳақли эмас:

дивидендлар тўланадиган пайтда Банкда банкротлик белгилари мавжуд бўлса ёки Банкда шундай белгилар дивидендларни тўлаш натижасида пайдо бўлса;

Банк соф активларининг қиймати унинг устав капитали ва захира фонди суммасидан кам бўлса.

Мазкур кўрсатиб ўтилган ҳолатлар тугатилгач, Банк дивидентларни тўлаши шарт.

40. Банк фойдасидан дивидендлар тўлаш, шунингдек Банкнинг Кузатув кенгаши, Бошқарув аъзолари ва ходимларини мукофотлаш орқали фойдани тақсимлашни қуйидаги ҳолларда амалга оширишга ҳақли эмас:

пруденциал нормативлар Марказий банк томонидан белгиланган талабларга мувофиқ бўлмаганда ёки улар мазкур тақсимлаш оқибатида бузилганда;

ночорлик (банкротлик) бўлганда ёки мазкур тақсимлаш оқибатида ноцорликнинг (банкротликнинг) аломатлари юзага келганда;

Марказий банкнинг ижро этилиши мажбурий бўлган кўрсатмасида акс эттирилган, шу жумладан ахборотни ошкор этиш борасида кўрсатилган камчиликлар бартараф этилмаганда ёки уларни бартараф этиш имконияти мавжуд бўлмаганда;

Марказий банкнинг фойдани тақсимламаслик тўғрисида Банкка нисбатан талаби мавжуд бўлганда.

Ушбу банднинг биринчи қисмининг иккинчи ва учинчи хатбошиларида кўрсатилган ҳолатлар тугатилгач, банк ҳисобланган дивидендларни акциядорларга тўлаши шарт.

41. Банк қуйидаги ҳолларда фойдани тақсимлаш учун Марказий банкнинг розилигини олиши керак:

Банк фойдасидан дивидендлар тўлаш, шунингдек Банк Кузатув кенгаши, Бошқарув аъзолари ва ходимларини мукофотлаш учун тўловларнинг умумий суммаси Банкнинг ўз капиталининг ўн фоизидан ортганда;

жорий ёки ўтган чорақда ва (ёки) молия йилида зарар мавжуд бўлганда.

## **9. БАНКНИНГ БОШҚАРУВ ОРГАНЛАРИ**

42. Қуйидагилар Банкнинг бошқарув органлари ҳисобланади:

Ягона акциядор;

Банк Кузатув кенгаши;

Банк Бошқаруви.

43. Банкнинг бошқарув органлари фаолиятининг мазкур Устав ва Банкнинг ички меъёрий ҳужжатлари билан тартибга солинмаган масалалари қонун ҳужжатлари билан тартибга солинади.

44. Банк Кузатув кенгаши ва Банк Бошқаруви ушбу Устав ва Банкнинг ички меъёрий ҳужжатлари, Ягона акциядорнинг қарорлари ва қонун ҳужжатларида белгиланган ваколатлар доирасида Банк фаолиятига раҳбарлик қилади.

45. Банк фаолиятини самарали ташкил этиш, Банкни бошқарув органлари, меҳнат жамоаси вакиллари ўртасида ўзаро муносабатлар тизимини таъминлаш Банкнинг ички меъёрий ҳужжатлари асосида амалга оширилади.

### **Ягона акциядор**

46. Ягона акциядор Банкнинг юқори бошқарув органидир. Банкнинг Ягона акциядори бўлиб “LEADER FINANCE” масъулияти чекланган жамияти ҳисобланади.

47. Банкнинг барча акциялари битта акциядорга тегишли бўлганлиги сабабли Банкда акциядорлар умумий йиғилиши ўтказилмаган ҳолда Ягона акциядорнинг қарори қабул қилинади.

“Ўзбекистон Республикасининг “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги қонуни ва мазкур Устав билан акциядорларнинг умумий йиғилиши ваколатига киритилган масалалар бўйича қарорлар Банк Ягона акциядори томонидан яқка тартибда қабул қилинади ҳамда ёзма шаклда расмийлаштирилади. Бунда ушбу қонунда кўрсатилган акциядорлар умумий йиғилишига тайёргарлик кўриш, уни чақириш ва ўтказиш тартибини ҳамда муддатларини белгилловчи қоидалари қўлланилмайди. Акциядорларнинг йиллик умумий йиғилишини ўтказиш муддатларига тааллуқли қоидалар бундан мустасно.

48. Ягона акциядор ҳар йили молия йили тугаганидан кейин олти ойдан кечиктирмай тугалланган молия йилидаги Банк фаолияти юзасидан ўз ваколати доирасида йиллик қарор қабул қилиши лозим.

49. Ягона акциядор томонидан ҳар бир молия йили якуни бўйича

қарорлар қабул қилинишидан ташқари Банк Кузатув кенгашининг ташаббусига биноан, Банкнинг Тафтиш комиссиясининг талаби ва Банк Бошқарувининг талаби билан ҳам қонунчиликда белгиланган бошқа масалалар юзасидан навбатдан ташқари қарорлар қабул қилиши мумкин.

Шунингдек, Ягона акциядор “Банклар ва банк фаолияти тўғрисида”ги қонун талабларига мувофиқ Марказий банк талаби билан ҳам Марказий банк томонидан қўйилган масалалар бўйича навбатдан ташқари қарорлар қабул қилишга ҳақли.

50. Амалдаги қонун ҳужжатлари ва ушбу Устав билан белгиланган ваколатлар доирасида Ягона акциядорнинг барча қарорлари “LEADER FINANCE” МЧЖ томонидан қабул қилинади.

51. Ягона акциядорнинг қарорлар қабул қилиш тартиби ва жараёни Ягона акциядор томонидан тасдиқланадиган Низом билан тартибга солинади.

52. Ягона акциядорнинг ваколат доирасига қуйидагилар киради:

1) Банкнинг Уставига ўзгартиришлар ва қўшимчалар киритиш ёки Банкнинг янги таҳрирдаги Уставини тасдиқлаш;

2) Банкни қайта ташкил этиш;

3) Банкни тугатиш, тугатувчини (тугатиш комиссиясини) тайинлаш ҳамда оралиқ ва якуний тугатиш балансларини тасдиқлаш;

4) Банк Кузатув кенгаши ва Тафтиш комиссиясининг сон таркибини белгилаш, уларнинг аъзоларини сайлаш ва аъзоларнинг ваколатларини муддатидан илгари тугатиш;

5) Банк Бошқарув раисини сайлаш (тайинлаш), унинг ваколатини муддатидан илгари тугатиш;

6) Банкнинг устав капиталини ошириш ёки камайтириш;

7) эълон қилинган акцияларнинг энг кўп миқдорини белгилаш;

8) ўз акцияларини қайтариб сотиб олиш;

9) акцияларни майдалаш ва йириклаштириш;

10) корпоратив облигациялар, шу жумладан, акцияларга айирбошланадиган облигациялар чиқариш ҳамда қайтариб сотиб олиш тўғрисида қарор қабул қилиш;

11) қимматли қоғозларнинг ҳосилаларини чиқариш тўғрисида қарор қабул қилиш;

12) Банкнинг ташкилий тузилмасини тасдиқлаш;

13) Банкнинг йиллик ҳисоботини, шунингдек Банк фаолиятининг асосий йўналишлари ва мақсадидан келиб чиққан ҳолда Банкни ўрта муддатга ва узоқ муддатга ривожлантиришнинг аниқ муддатлари белгиланган стратегиясини тасдиқлаш;

14) Банкнинг фойдаси ва зарарларини тақсимлаш;

15) Банк Кузатув кенгашининг ва Тафтиш комиссиясининг ўз ваколат доирасига кирадиган масалалар юзасидан, шу жумладан Банкни бошқаришга доир қонун ҳужжатларида белгиланган талабларга риоя этилиши юзасидан Банк Кузатув кенгашининг ҳисоботларини ва Тафтиш комиссиясининг

хулосаларини эшитиш;

16) Банк Ягона акциядори тўғрисидаги, Банк Тафтиш комиссияси тўғрисидаги, Банк Кузатов кенгаши тўғрисидаги ва Банк Бошқаруви тўғрисидаги ҳамда Банк Кузатов кенгаши аъзоларини мукофотлаш тартиби тўғрисидаги Низомларни, шунингдек қонун ҳужжатларига мувофиқ Ягона акциядор мутлақ ваколатига кирувчи Банкнинг бошқа ички меъёрий ҳужжатларини тасдиқлаш ҳамда уларга ўзгартириш ва қўшимчалар киритиш;

17) баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг 50 (Эллик) фоизидан ортиғини ташкил этувчи мол-мулк хусусида Банк томонидан йирик битим тузиш тўғрисида қарор қабул қилиш;

18) йирик битим тузиш масаласи бўйича Банк Кузатов кенгашининг яқдиллигига эришилмаган тақдирда Банк томонидан йирик битим тузиш тўғрисида қарор қабул қилиш;

19) Банк Кузатов кенгашининг икки ва ундан ортиқ аъзоси аффилланган шахс бўлган ҳолларда Банк томонидан битим тузиш тўғрисида қарор қабул қилиш ҳамда Банкнинг аффилланган шахслари билан Банк Бошқаруви томонидан битимларни тузишни олдиндан маъқуллаш;

20) мажбурий аудиторлик текширувини ўтказиш учун аудиторлик ташкилотини белгилаш, ушбу ташкилотнинг хизматларига тўланадиган энг кўп ҳақ миқдори ва у билан шартнома тузиш (шартномани бекор қилиш) тўғрисида қарор қабул қилиш;

21) қонун ҳужжатларига мувофиқ бошқа масалаларни ҳал этиш.

53. Амалдаги қонун ҳужжатлари ва мазкур Уставга мувофиқ Ягона акциядорнинг ваколат доирасига киритилган масалалар Банк Кузатов кенгаши ва Банк Бошқарувига ҳал қилиши учун берилиши мумкин эмас.

54. Ягона акциядорнинг кун тартибига киритилмаган масалалар бўйича қарор қабул қилишга, шунингдек кун тартибига ўзгартишлар киритиш мумкин эмас.

55. Ягона акциядор томонидан қабул қилинган қарорлар амалдаги қонун ҳужжатларида назарда тутилган тартиб ва муддатларда эълон қилинади.

### **Банк Кузатов кенгаши**

56. Банк Кузатов кенгаши Банк фаолиятига умумий раҳбарликни амалга оширади, бошқарувга оид қарорлар қабул қилиш жараёнида назорат ва текширув вазифасини бажаради ҳамда умуман Банкнинг фаолияти ва молиявий барқарорлиги учун жавобгар ҳисобланади, “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги Ўзбекистон Республикаси Қонуни ва мазкур Устав билан Ягона акциядорнинг ваколат доирасига киритилган масалаларни ҳал этиш бундан мустасно.

57. Банк Кузатов кенгаши Банкни самарали ва тадбирли бошқаришни, шу жумладан Банк Бошқаруви аъзолари ўртасида ваколатларнинг ҳамда жавобгарликнинг тақсимланишини, манфаатлар тўқнашувининг олди

олинишини ва бартараф этилишини таъминлайдиган бошқарув ташкилий тузилмасини белгилайди ҳамда унинг жорий этилиши устидан назорат ва текширувни амалга оширади.

58. Банк Кузатув кенгаши аъзолари Банкнинг оқилона корпоратив бошқарувига кўмаклашиши ҳамда ўз ваколатларини ва мажбуриятларини бажариш чоғида Банкнинг, унинг омонатчилари ва акциядорларининг қонуний манфаатларини инобатга олиши, шунингдек Марказий банк билан самарали ҳамкорликни таъминлаши керак.

59. Ягона акциядорнинг қарорига кўра Банк Кузатув кенгашининг аъзоларига улар ўз вазифаларини бажариб турган давр учун ҳақ тўланиши ва (ёки) Банк Кузатув кенгашининг аъзоси вазифаларини бажариш билан боғлиқ харажатларининг ўрни қопланиши мумкин. Бундай ҳақ ва тўловларнинг миқдорлари Банк Кузатув кенгаши аъзоларини мукофотлаш тартиби тўғрисида Банкнинг ички меъёрий ҳужжатида белгиланади.

60. Банк Кузатув кенгашининг ваколат доирасига қуйидагилар киради:

- 1) Банк фаолиятининг устувор йўналишларини белгилаш;
- 2) Ягона акциядор томонидан тасдиқланган узоқ муддатли стратегия асосида Банкнинг қисқа (бир йиллик) ва/ёки ўрта муддатли (уч йиллик) бизнес-режаларни тасдиқлаш;
- 3) Банкнинг қабул қилинган бизнес-режаси бажарилиши устидан назорат қилиш, шунингдек ҳар чорақда Банкнинг фаолияти натижалари тўғрисида Банк Бошқарувининг ҳисоботини эшитиш;
- 4) йиллик молиявий ҳисоботларни тасдиқлаш ҳамда бухгалтерия ҳисоби ва молиявий ҳисоботлар тизимининг яхлитлигини таъминлаш;
- 5) Банкнинг захира фондидан ва бошқа фондларидан фойдаланиш;
- 6) Банкнинг молиявий ҳолатини тиклаш режаларини тасдиқлаш;
- 7) мол-мулкнинг бозор қийматини белгилашни ташкил этиш;
- 8) Банкнинг тижорат ва нотижорат ташкилотлардаги иштироки билан боғлиқ битимларни қонун ҳужжатларида белгиланган тартибда тузиш;
- 9) Банкнинг филиаллари, банк хизматлари марказларини ташкил этиш ва ваколатхоналарини очиш;
- 10) Банкнинг шўъба ва тобе ҳўжалик жамиятларини ташкил этиш;
- 11) Банкнинг ташкилий тузилмаси лойиҳасини ишлаб чиқиш;
- 12) Банк томонидан депозит сертификатлари чиқариш, уларни қайтариб сотиб олиш тўғрисида қарорлар қабул қилиш;
- 13) “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги Ўзбекистон Республикаси Қонунига мувофиқ акцияларни жойлаштириш (қимматли қоғозларнинг биржа бозорига ва уюшган биржадан ташқари бозорига чиқариш) нархини белгилаш;
- 14) баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг 15 (Ўн беш) фоизидан 50 (Эллик) фоизигачасини ташкил этувчи мол-мулк хусусида йирик битим тузиш тўғрисидаги қарор қабул қилиш;



15) йирик битим тузиш масаласи бўйича Банк Кузатув кенгашининг яқдиллигига эришилмаган тақдирда йирик битим тузиш масаласини Ягона акциядорга ҳал қилиши учун олиб чиқиш тўғрисида қарор қабул қилиш;

16) “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги Ўзбекистон Республикаси Қонунига мувофиқ аффилиланган шахс билан банк томонидан битим тузиш тўғрисидаги қарор қабул қилиш;

17) дивиденд миқдори, уни тўлаш шакли ва тартиби юзасидан Ягона акциядор кўриб чиқиши учун тавсиялар киритиш;

18) Банкни қайта ташкил этиш ва тугатиш тўғрисида Ягона акциядор кўриб чиқиши учун тавсиялар киритиш;

19) Банк устав фонди (капитали)ни ошириш ёки камайтириш тўғрисида Ягона акциядор кўриб чиқиши учун тавсиялар киритиш;

20) Банк Уставига ўзгартириш ва қўшимчалар киритиш ёки Банкнинг янги тахрирдаги Уставини тасдиқлаш тўғрисида Ягона акциядор кўриб чиқиши учун тавсиялар киритиш;

21) фойда ва зарарларни тақсимлаш тўғрисида Ягона акциядор кўриб чиқиши учун тавсиялар киритиш;

22) Банкнинг Тафтиш комиссияси аъзоларига тўланадиган ҳақ ва компенсацияларнинг миқдорлари юзасидан Ягона акциядор кўриб чиқиши учун тавсиялар киритиш;

23) Банк Бошқарув раисини бир (ёки уч) йил муддатга сайлаш (тайинлаш), унинг ваколатини муддатидан илгари тугатиш тўғрисида Ягона акциядор кўриб чиқиши учун тавсиялар киритиш;

24) Ягона акциядор қарори асосида Банк Бошқаруви раиси билан бир (ёки уч) йил муддатга меҳнат шартномасини тузиш, шартноманинг амал қилиш муддатини узайтириш ёки уни бекор қилиш;

25) Банк Бошқарув раисининг ваколати муддатидан илгари тугатилган тақдирда, унинг вазифасини вақтинча бажарувчини тайинлаш;

26) Банк Бошқаруви аъзоларини сайлаш (тайинлаш), уларнинг ваколатларини муддатидан илгари тугатиш;

27) Банк Бошқаруви устидан назоратни амалга ошириш;

28) Банк Бошқаруви аъзолари томонидан тақдим этилган ахборотни, таклифларни ва тушунтиришларни ўрганиш, муҳокама қилиш ҳамда улар бўйича баҳслашиш;

29) Банк фаолиятини бошқариш тизими самарадорлигини, шу жумладан Банк Бошқаруви принциплари мониторингини ва уларни даврий баҳолашни амалга ошириш ҳамда аниқланган камчиликларни бартараф этиш учун тегишли чораларни кўриш;

30) Банк Бошқарувида тўланадиган ҳақ ва (ёки) компенсацияларни, шунингдек уларнинг энг юқори миқдорларини белгилаш;

31) корпоратив маслаҳатчи (ва/ёки корпоратив котиб)ни тайинлаш ва уларнинг фаолияти тартибини белгиловчи низомни тасдиқлаш;

32) стратегик мақсадларни, корпоратив бошқарув сиёсатини, Банкнинг бошқа ички сиёсатларини, шу жумладан таваккалчиликларни аниқлаш, бошқариш, мониторинг қилиш ва улар тўғрисида хабардор этиш, капиталнинг етарлилигини лозим даражада сақлаб туриш сиёсатини тасдиқлаш ҳамда уларнинг амалга оширилиши устидан назорат қилиш;

33) манфаатлар тўқнашувининг олдини олиш ва уни бартараф этиш тартибини тасдиқлаш;

34) қонун ҳужжатларига мувофиқ Банк Кузатув кенгаши ваколатига кирувчи Банкнинг бошқа ички меъёрий ҳужжатларини тасдиқлаш ҳамда уларга ўзгартириш ва қўшимчалар киритиш;

35) ички аудит хизматини ташкил этиш ва унинг ходимларини тайинлаш, шунингдек ҳар чорақда унинг ҳисоботларини эшитиб бориш ва улар асосида Банк Бошқаруви томонидан Банк стратегиялари ва сиёсатларига риоя этилишини баҳолашдан ўтказиш;

36) активларни таснифлаш асосида активлар бўйича эҳтимолдаги зарарларга қарши яратиладиган захиралар шакллантирилиши устидан назорат қилиш, шунингдек Банкнинг капитал ва умумий захираларининг етарли даражада сақлаб турилишини таъминлаш;

37) бир йилда камида бир марта амалга оширилган назорат ва текширув фаолияти тўғрисида Ягона акциядорга ҳисобот тақдим этиш;

38) бизнес режа доирасида хайрия, ҳомийлик ва беғараз ёрдам бериш тўғрисида қарорлар қабул қилиш ва бу тўғрисида Ягона акциядорга маълумот тақдим этиш;

39) Банкнинг узоқ муддатли молиявий манфаатларини ва Марказий банк томонидан капиталга нисбатан белгиланган талабларни ҳисобга олган ҳолда пруденциал талабларга риоя этилишини таъминлаш;

40) коррупцияни олдини олиш юзасидан ички ҳужжатларни ҳамда одоб-ахлоқ қоидаларини тасдиқлаш;

41) қонун ҳужжатларига ҳамда мазкур Уставга мувофиқ Банк Кузатув кенгашининг ваколат доирасига кирувчи бошқа масалаларни ҳал қилиш.

61. Банк Кузатув кенгашининг ваколат доирасига киритилган масалалар ҳал қилиш учун Банк Бошқарувига ўтказилиши мумкин эмас.

62. Банк Кузатув кенгашининг аъзолари “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги Ўзбекистон Республикаси Қонунида ва мазкур Уставда назарда тутилган тартибда Ягона акциядор томонидан 3 (Уч) йил муддатга сайланади.

Банк Кузатув кенгаши таркибига сайланган шахслар чекланмаган тарзда қайта сайланиши мумкин.

Банк Бошқаруви аъзолари ва унинг шўъба ва тобе хўжалик жамиятларида меҳнат шартномаси (контракт) бўйича ишлаётган шахслар ва ушбу жамиятлар бошқарув органларининг аъзолари Банк Кузатув кенгашига сайланиши мумкин эмас.

Банкда меҳнат шартномаси (контракт) бўйича ишлаётган шахслар Банк

Кузатув кенгаши аъзоси бўлиши мумкин эмас.

Банкнинг кузатув кенгаши аъзолари сони беш кишини ташкил қилади ва булардан камида бир нафари мустақил аъзодан иборат бўлади.

Қуйидагилар Кузатув кенгашининг мустақил аъзоси бўлиши мумкин эмас:

сўнгги уч йил ичида Банкда ва (ёки) Банкнинг аффилланган шахсларида ишлаган шахс;

Банкнинг Ягона акциядори;

Банкнинг ва (ёки) унинг аффилланган шахсининг йирик мижози ва (ёки) йирик етказиб берувчиси билан фуқаролик-ҳуқуқий муносабатларда бўлган шахс. Бунда қайси шахслар билан базавий ҳисоблаш миқдорининг икки минг бараваридан кўп бўлган суммага тенг амалдаги шартнома мавжуд бўлса, ўша шахслар йирик мижоз ва йирик етказиб берувчи деб эътироф этилади;

сўнгги уч йил ичида Банка ва (ёки) Банкнинг аффилланган шахсларига аудиторлик хизматларини кўрсатган аудиторлик ташкилотининг ходими;

кетма-кет олти йил давомида Банкнинг Кузатув кенгаши таркибига кирган шахс;

Банк ва (ёки) унинг аффилланган шахслари билан бирор-бир келишувга эга бўлган шахс, бундан Кузатув кенгаши аъзосининг вазифалари ва функциялари бажарилишини таъминлаш билан боғлиқ бўлган келишувлар мустасно;

Банкнинг бошқарув ва ички назорат органларининг ва (ёки) унинг аффилланган шахсларининг аъзоси бўлган шахсининг ёки сўнгги уч йил ичида уларга аъзо бўлган шахсининг яқин қариндоши ёки куда томондан қариндоши (ота-онаси, ака-укалари, опа-сингиллари, ўғиллари, қизлари, эри (хотини), шунингдек эрининг (хотинининг) ота-онаси, ака-укалари, опа-сингиллари ва фарзандлари) бўлган шахс;

давлат бошқаруви органининг ёки давлат корхонасининг ходими бўлган шахс;

Банкнинг уставида ёки Ягона акциядор қарорлари билан тасдиқланган ҳужжатларда белгиланган талабларга мувофиқ бўлмаган шахс.

Банк Банкнинг Кузатув кенгаши таркибига сайланган мустақил аъзоларнинг реестрини юритади ва уни ўз расмий веб-сайтида эълон қилади.

Банк Кузатув кенгаши мустақил аъзоларининг реестрини юритиш тартиби қимматли қоғозлар бозорини тартибга солиш бўйича ваколатли давлат органи томонидан белгиланади.

Банк Кузатув кенгаши мустақил аъзосининг ушбу банднинг олтинчи хатбошисида белгиланган талабларга мувофиқлиги ўзгарган тақдирда, у Банкни ва Кузатув кенгашини бу ҳақда икки иш куни ичида хабардор қилиши шарт. Бу ҳолда белгиланган тартибда бошқа номзод мустақил аъзо сифатида таклиф этилади.

Банк Кузатув кенгашининг мустақил аъзоси Кузатув кенгашининг бошқа аъзолари билан бир қаторда амалдаги қонунчиликда белгиланган тенг

ҳуқуқлар ва мажбуриятларга эга бўлади.

Кузатув кенгаши аъзоларининг кўпчилиги Банкка алоқадор шахслар бўлмаслиги керак, бундан уларнинг кузатув кенгашидаги аъзолиги мустасно.

Банк Кузатув кенгаши аъзолари ўз мулоҳазаларининг мустақиллиги бўйича талабларга риоя этиши керак.

Банк Кузатув кенгашининг аъзолигига кўрсатилаётган номзодларни уларнинг лавозимга киришишидан олдин Марказий банк билан келишилади.

Куйидаги ҳолларда шахс Банк Кузатув кенгаши аъзолигига сайланиши мумкин эмас ёки сайланган шахс Банк Кузатув кенгаши аъзолиги ҳуқуқидан маҳрум этилади, агар:

шахс икки ёки ундан ортиқ банкнинг Кузатув кенгаши аъзоси бўлса ёки аъзо бўлиш ниятида бўлса, бундан мазкур банклар бир банк гуруҳига тегишли бўлган ҳоллар мустасно;

шахснинг ваколатлари Марказий банк талабига кўра муддатидан илгари тугатилган бўлса.

63. Банк Кузатув кенгашини тузиш, мажлисларни ўтказиш, овоз бериш ва қарорлар қабул қилиш тартиби Ягона акциядор томонидан тасдиқланадиган Банк Кузатув кенгаши тўғрисидаги Низом билан тартибга солинади.

64. Банк Кузатув кенгашининг раиси Банк Кузатув кенгаши аъзоларининг умумий сонига нисбатан кўпчилик овоз билан, ушбу Банк Кузатув кенгаши таркибидан Банк Кузатув кенгаши аъзолари томонидан сайланади.

Банк Кузатув кенгашининг раиси унинг ишини ташкил этади, Банк Кузатув кенгаши мажлисларини чақиради ва уларда раислик қилади, мажлисларда баённома юритилишини ташкил этади.

Банк Кузатув кенгашининг раиси бўлмаган тақдирда унинг вазифасини Банк Кузатув кенгаши аъзоларидан бири амалга оширади.

65. Банк Кузатув кенгаши мажлиси Банк Кузатув кенгаши раиси томонидан унинг ўз ташаббусига кўра ёки Банк Кузатув кенгаши аъзосининг, Тафтиш комиссияси аъзосининг, Банк Бошқаруви аъзосининг, Банк ички аудит хизмати раҳбарининг, Банкнинг ташқи аудиторининг, Марказий банкнинг талабига кўра чақирилади.

66. Банк Кузатув кенгаши мажлисини ўтказиш учун кворум Банк Кузатув кенгаши аъзолари белгиланган сонининг камида 75 (Етмиш беш) фоизини ташкил қилиши керак.

67. Банк Кузатув кенгашининг мажлисида қарорлар, агар қонун ҳужжатларида ва мазкур Уставда ўзгача қоида назарда тутилмаган бўлса, мажлисда ҳозир бўлганларнинг кўпчилик овози билан қабул қилинади. Банк Кузатув кенгашининг мажлисида масалалар ҳал этилаётганда Банк Кузатув кенгашининг ҳар бир аъзоси битта овозга эга бўлади.

68. Банк Кузатув кенгашининг мажлисида куйидаги қарорлар бир овоздан қабул қилиниши лозим:

Банкнинг устав фонди (капитали)ни қўшимча акцияларни жойлаштириш

йўли билан кўпайтириш тўғрисидаги;

Банк Уставига тегишли ўзгартириш ва қўшимчалар киритиш ҳақидаги;

баланс қиймати ёки олиш қиймати битим тузиш тўғрисида қарор қабул қилинаётган санада Банк соф активлари миқдорининг 15 (Ўн беш) фоизидан 50 (Эллик) фоизигачасини ташкил этувчи мол-мулк хусусида йирик битим тузиш тўғрисидаги;

аффилланган шахс билан банк томонидан битим тузиш тўғрисидаги.

69. Банк Кузатув кенгашининг қарорлари сиртдан овоз бериш йўли билан (сўров йўли билан) Банк Кузатув кенгашининг барча аъзолари томонидан бир овоздан қабул қилиниши мумкин.

70. Банк Кузатув кенгашининг бир аъзоси ўз овозини Банк Кузатув кенгашининг бошқа аъзосига беришига йўл қўйилмайди. Банк Кузатув кенгаши аъзоларининг овозлари тенг бўлган тақдирда Банк Кузатув кенгаши томонидан қарор қабул қилишда Банк Кузатув кенгаши раисининг овози ҳал қилувчи ҳисобланади.

### **Банк Бошқаруви**

71. Банк Бошқаруви Банкни бошқаришнинг ижро этувчи органи бўлиб, у Банкнинг кундалик фаолиятига раҳбарлик қилади, Банк Кузатув кенгаши томонидан тасдиқланган фаолият стратегияси ва уни бошқариш тизимига мувофиқ Банкнинг фаолиятига оператив бошқарувни амалга оширади ҳамда Банкнинг фаолияти учун жавобгарликни тўлиқ зиммасига олади.

72. Банк Бошқаруви таркиби 5 (Беш) аъзодан, шу жумладан Банк Бошқарув раиси ва унинг аъзоларидан иборат.

73. Банк Бошқарувнинг аъзолигига ҳамда муҳим аҳамиятга эга ходимлар лавозимларига кўрсатилаётган номзодларни уларнинг лавозимга киришишидан олдин Марказий банк билан келишилади. Агар муҳим аҳамиятга эга ходимларни объектив сабабларга кўра олдиндан келишиб олишнинг имкони бўлмаса, Банк кейинчалик розилик олиш учун сўровнома юборилади.

74. Бошқарув раиси танлов бўйича саралаш асосида танланади ҳамда Ўзбекистон Республикасининг қонун ҳужжатларига мувофиқ Ягона акциядор томонидан лавозимига тайинланади ва лавозимидан озод қилинади.

Бошқарув раисининг ўринбосарлари ва Банк Бошқаруви аъзолари амалдаги қонунчиликка мувофиқ Банк Кузатув кенгаши томонидан ўрнатилган тартибда тайинланади ва лавозимидан озод қилинади.

Банк бошқаруви раиси ва аъзолари билан меҳнат шартномаси 3 (Уч) йил муддатга тузилади.

75. Банк Бошқарувининг ваколатларига Банк жорий фаолиятига раҳбарлик қилишга доир барча масалалар киради, Ягона акциядорнинг мутлақ ваколатларига ва Банк Кузатув кенгашининг ваколатларига киритилган масалалар бундан мустасно. Жумладан, Банк Бошқарувининг ваколат доирасига қуйидагилар киради:

1) Ягона акциядор ва Банк Кузатув кенгашида муҳокама этиладиган барча масалаларни олдиндан кўриб чиқади, улар юзасидан тегишли ҳужжатлар

ва қарор лойиҳаларини тайёрлаш;

2) Ягона акциядор ва Банк Кузатув кенгаши қарорларининг бажарилишини ташкил этиш ва/ёки ижросини таъминлаш;

3) Банкнинг сиёсат (кредит, инвестиция, эмиссия, дивиденд, ички назорат, бухгалтерия, кадрлар ва ҳ.к.)лари, Банкнинг ривожлантириш стратегияси, бизнес-режаси лойиҳаларини ишлаб чиқиш ҳамда уларни Ягона акциядор ва Банк Кузатув кенгашига тасдиқлаш учун киритиш;

4) Банкнинг сиёсатларини ва Банкнинг ривожлантириш стратегиясини жорий этилишини ҳамда Банк бизнес-режасининг ижросини таъминлаш;

5) қонун ҳужжатларига асосан Банк Бошқаруви ваколатига кирувчи Банкнинг ички меъёрий ҳужжатларини тасдиқлаш;

6) ўз ваколати доирасидаги Банкнинг таркибий бўлинмалари (департамент, бошқарма ва бўлимлар) тўғрисидаги Низомларни тасдиқлаш;

7) корпоратив бошқарувининг замонавий ва илғор услубларини жорий этиш, корпоратив бошқарув кодекси тавсияларини татбиқ этилишини ташкил қилиш ва Банкнинг корпоратив бошқарувга оид сиёсатни ишлаб чиқиш;

8) Банкда қонун ҳужжатлари ва ҳалқаро стандартларга мувофиқ бухгалтерия ҳисобини юритилишини ва молиявий ҳисобот тақдим этилишини, мониторинг қилиш ва таваккалчиликлар тўғрисида хабардор этиш, капиталнинг етарлилигини лозим даражада сақлаб туриш сиёсатини амалга ошириш;

9) Банкнинг фаолияти яқунларини, депозитларни қабул қилиш, активларни жойлаштириш, кредитлашни ташкил этиш, ҳисоб-китоблар, пул муомаласи, касса хизмати, ташқи иқтисодий фаолиятни ташкил этиш масалаларини кўриб чиқиш;

10) ҳар чоракда Банк Кузатув кенгашига Банкнинг молиявий ҳолати ва фаолияти, тасдиқланган бизнес-режа ижроси ҳақида ҳисобот тақдим этиш;

11) Банк хизматларининг янги турларини ишлаб чиқиш ва жорий этиш;

12) ҳисоб-китоб хизматлари кўрсатиш, кредит, пул ва тўлов ҳужжатлари ва хат-ҳужжатларни расмийлаштиришнинг умумий шартлари ва тартибини белгилаш;

13) стратегик мақсадларни, корпоратив бошқарув сиёсатини, Банкнинг бошқа ички сиёсатларини, шу жумладан таваккалчиликларни аниқлаш, бошқариш, мониторинг қилиш ва таваккалчиликлар тўғрисида хабардор этиш, капиталнинг етарлилигини лозим даражада сақлаб туриш сиёсатини амалга ошириш;

14) Банкнинг тегишли ва шаффоф ташкилий тузилмасини, шу жумладан ваколатларни ва жавобгарликни Банк ходимлари ўртасида ўз ваколатлари доирасида тақсимлашни таъминлаш;

15) Банк ходимларининг фаолияти устидан назоратни амалга ошириши;

16) Банкнинг иш амалиётига энг илғор банк технологиялари, банк ишларини комплекс автоматлаштириш лойиҳалари жорий этилишини ташкил этиш, замонавий банк инфратузилмаси яратилишини таъминлаш;

17) Банк миждозларига кўрсатиладиган хизматлар бўйича фоиз

ставкалари ва воситачилик ҳақи миқдорини белгилаш;

18) кўрилиши мумкин бўлган зарарлар миқдорини камайтириш мақсадида Банк активларининг диверсификацияланишини амалга ошириш;

19) Банк томонидан Марказий банк белгилаган иқтисодий нормативларга ҳамда мажбурий заҳираларни шакллантириш юзасидан талабларга риоя қилинишини таъминлаш;

20) банкнинг капитали ва ликвидли ресурслари етарли даражада бўлишини, активларни таснифлаш орқали эҳтимолий йўқотишларга қарши заҳиралар яратилишини таъминлаш;

21) қонун ҳужжатларида белгиланган тартиб ҳамда халқаро стандартларга мувофиқ банк бухгалтерия ҳисоби ва ҳисоботи юритилишини ташкил этиш;

22) қонунчиликда белгиланган тартибда Ягона акциядорнинг талаби бўйича молиявий ҳисоботни ва Банк фаолияти тўғрисидаги бошқа ахборотларни уларга тақдим этиш;

23) Банкнинг қабул қилинган йиллик бизнес-режасини бажариши, шунингдек, Ягона акциядорга ва Банк Кузатув кенгашига бажарилган ишлар, молиявий натижалар, Банкка нисбатан қўлланилган чоралар ҳамда санкциялар тўғрисидаги ҳисоботни даврий равишда тақдим этиш;

24) Банк Кузатув кенгашида кўриб чиқиш учун Ягона акциядор томонидан тасдиқланган узоқ муддатли стратегия асосида банкнинг қисқа муддатли бизнес-режаларни ва Банк Кузатув кенгаши ваколатларига тааллуқли бошқа масалалар бўйича таклифлар киритиш;

25) банк тизимида қонун ҳужжатлари ва бошқа меъёрий-ҳуқуқий ҳужжатларга риоя қилиниши устидан назорат қилиш;

26) ишчи органларни, шу жумладан Банк қўмиталар ва комиссияларини тузиш, уларнинг ваколатларини белгилаш ва низомларни тасдиқлаш;

27) баланс қиймати ёки олиш қиймати битим тузиш тўғрисида қарор қабул қилинаётган санада банк соф активлари миқдорининг ўн беш фоизигача бўлган миқдордаги битимларини тузиш тўғрисида қарорларни қабул қилиш;

28) ҳар йили Банкнинг кредит режасини шакллантиришда молиялаштириш мўлжалланаётган инвестиция лойиҳаларининг пухта танлаб олинишини, самарадорлиги комплекс баҳоланишини ва экспертизадан ўтказилишини таъминлаш;

29) амалга оширилаётган инвестиция лойиҳаларининг ўзини ўзи қоплаши, қўйилган маблағларнинг ўз вақтида ва тўлиқ қайтарилиши устидан тизимли мониторинг олиб бориш ҳамда натижалари тўғрисида ҳар чоракда Банк Кузатув кенгашига ахборот бериш;

30) ҳомийлик тўғрисидаги қонуни ҳужжатларига мувофиқ ҳомийлик ва хайрия ишларини амалга ошириш;

31) Банк Бошқаруви ваколати доирасида бўлган қимматли қоғозларни чиқариш ва муомалада бўлиш тўғрисидаги қарор қабул қилиш;

32) Банк Уставида ҳамда қонунчиликда назарда тутилган бошқа

мажбуриятларни бажариш.

76. Банк Бошқаруви Ягона акциядор ва Банк Кузатув кенгашига ҳисобдор.

77. Банк Бошқаруви раиси қуйидаги ваколатларга эга:

Банкнинг кундалик фаолиятига тезкор раҳбарлик қилиш;

Банк номидан Уставга асосан ишончномасиз иш юритиш;

бошқа ташкилотлар ва органлар билан бўлган ўзаро муносабатларда Банкнинг манфаатларини ифодалаш;

Банк номидан битим ва шартномалар, шу жумладан меҳнат шартномаларини тузиш;

Банкнинг ички меъёрий ҳужжатларида белгиланган тартибда унинг мол-мулки ва пул маблағларини тасарруф қилиш;

Банк номидан ҳаракат қилиш учун ходимларга ишончномалар бериш;

Банкнинг ходимларини, филиаллар, ваколатхоналар ва шўъба корхоналар раҳбарларини тайинлаш, лавозим ойлик маошларини белгилаш ҳамда уларни лавозимдан озод қилиш;

штат жадвалларини тасдиқлаш;

Банк фаолиятини самарали ташкил қилиш мақсадида Банкнинг ташкилий-бошқарув тузилмасига ўзгартиришлар киритиш;

ходимларни рағбатлантириш, уларга нисбатан интизомий жазоларни қўллаш, шунингдек интизомий жазоларни олиб ташлаш;

Банкнинг таркибий тузилмалари ҳақидаги низомлар ва лавозим мажбуриятларини тасдиқлаш;

Бошқарув раиси ўринбосарлари ўртасида вазифаларни тақсимлаш;

ўз ваколати доирасида Банк тизимида бажарилиши мажбурий бўлган буйруқ, фармойиш ва кўрсатмаларни бериш;

Бошқарув раиси амалдаги қонунчилик, мазкур Устав ва Банкнинг бошқа ички меъёрий ҳужжатларига биноан бошқа ваколатларга эга.

78. Банк Бошқаруви раиси билан меҳнат шартномасини Банк номидан Банк Кузатув кенгаши раиси ёки Банк Кузатув кенгаши ваколат берган шахс имзолайди. Бошқарув раисининг ўринбосарлари, бошқарув аъзолари ва Банк бош бухгалтери билан меҳнат шартномаларини Банк номидан Банк Бошқаруви раиси имзолайди.

79. Бошқарув раиси Банкнинг раҳбарлари ва ходимларини буйруқ билан тайинлайди ва улар билан Банк номидан меҳнат шартномаларини тузади.

80. Банк бошқаруви ва Банкнинг таркибий тузилмалари раҳбарлари Банк ҳисоботидаги ахборотнинг ишончлилиги учун жавоб беради.

81. Банк Кузатув кенгаши ва Бошқарувининг аъзолари ўз ҳуқуқларини амалга оширишда ва ўз мажбуриятларини бажаришда Банкнинг манфаатларини кўзлаб иш тутади ҳамда белгиланган тартибда жавобгар бўлади. Банк Кузатув кенгаши ва Бошқаруви аъзоларининг Банк олдидаги жавобгарлиги солидар ҳисобланади.

Агар Банк Бошқаруви томонидан йирик битим ёки аффилиланган



шахслар билан битим тузиш тартиби бузилганлиги натижасида Банкка зарар етказилган бўлса ва бунда Банк Бошқаруви раисининг ёки Бошқаруви аъзоларининг ёхуд ишончли бошқарувчининг айби қонунчиликда белгиланган тартибда исботланса, Банкнинг кредиторлар олдидаги қарздорлигини қоплаш учун унинг мол-мулки етарли бўлмаган тақдирда Банкнинг мажбуриятлари бўйича субсидиар жавобгар бўлади.

82. Банк Бошқарувини тузиш, мажлисларни ўтказиш ва қарорлар қабул қилиш тартиби Ягона акциядор томонидан тасдиқланадиган Банк Бошқаруви тўғрисидаги Низом билан тартибга солинади.

## **10. БАНКНИНГ ҲИСОБИ ВА ҲИСОБОТИ**

83. Банк бухгалтерия ҳисобини Марказий банк томонидан белгиланган қоидалар асосида ишлаб чиқилган ички ҳисоб-китоб сиёсатиға мувофиқ ташкил этади ва юритади.

84. Банкдаги бухгалтерия ҳисоби:

бошқарувга, молияга, солиққа ва назоратга оид ҳисоботнинг ҳамда бошқа ҳисоботларнинг ишончилигини, уларда банкнинг ҳақиқий молиявий ҳолати ва фаолияти натижалари акс этирилишини;

Банк активларини ва юзага келувчи таваккалчиликларни бошқариш хавфсизлигини;

Ягона акциядор ва Банк Кузатув кенгаши томонидан Банкнинг молиявий аҳволини ва унинг мансабдор шахсларининг ишини назорат қилиш имкониятини таъминлаши керак.

85. Банкда бухгалтерия ҳисобининг ташкил этилиши, ҳолати ва ишончилиги, тегишли органларга ҳар йилги ҳисобот ва бошқа молиявий ҳисоботлар, шунингдек банкнинг расмий веб-сайтида ва оммавий ахборот воситаларида акциядорларга, кредиторларга тақдим этиладиган банк фаолияти тўғрисидаги маълумотлар ўз вақтида тақдим этилиши учун жавобгарлик банк бошқарувининг зиммасида бўлади.

86. Банкнинг молиявий ҳисоботида кўрсатилган ва акциядорларнинг умумий йиғилишига тақдим этиладиган молиявий ҳисоботдаги, бухгалтерия балансидаги, фойда ва зарарлар ҳисобварағидаги маълумотларнинг ишончилиги мулкӣ манфаатлари банк ёки унинг акциядорлари билан боғлиқ бўлмаган аудиторлик ташкилоти томонидан тасдиқланган бўлиши керак.

87. Банк молиявий ҳисоботларни, банклар гуруҳининг асосий банки консолидациялашган молиявий ҳисоботларни уларда кўрсатилган маълумотларнинг тўғрилигини аудиторлик ташкилоти тасдиқлаганидан кейин Марказий банк томонидан белгиланадиган шаклда эълон қилади.

88. Банк ўз маблағларига, капиталга доир талабларнинг бажарилишига, ликвидликка, таваккалчиликларнинг қийматиға ва бошқа муҳим кўрсаткичларга (нормативларга) доир ахборотни ошкор этиши керак.

89. Банк ўз фаолияти тўғрисидаги ҳисоботларни Марказий банк томонидан белгиланган шаклларда, тартибда ва муддатларда тузади ҳамда

Марказий банкка тақдим этади.

Банк Марказий банкнинг талабига кўра консолидациялашган, даврий, шунингдек бир марталик ҳисоботларни тақдим этади.

Банк Марказий банкка тақдим этиладиган ҳисоботларнинг ва бошқа маълумотларнинг яхлитлиги ҳамда ишончлилиги учун жавобгардир.

90. Банкнинг йиллик ҳисоботи Ягона акциядор қарори қабул қилинганидан санадан ўн кундан кечиктирмай Банкнинг Кузатув кенгаши томонидан дастлабки тарзда тасдиқланиши лозим.

91. Банк Халқаро молиявий ҳисобот стандартларига мувофиқ тузилган йиллик молиявий ҳисоботни у Халқаро аудит стандартларига мувофиқ ташқи аудитдан ўтказилганидан кейин, Ягона акциядор қарори санадан камида икки ҳафта олдин эълон қилиши шарт.

92. Банк ошкор этилиши мажбурий бўлган ахборотни қонун ҳужжатларида белгиланган ҳажмда, муддатларда ва тартибда амалга оширади, шунингдек ўзи томонидан эмиссия қилинадиган қимматли қоғозларга тегишли бўлган ахборотни эълон қилади.

93. Банкнинг молиявий йили 1 январдан бошланади ва 31 декабрда тугайди.

94. Банк банк фаолияти давомида шаклландиган ҳужжатларнинг лозим даражада ҳисобга олиниши, сақланиши ва ундан фойдаланилишини таъминлайди.

Банк қонун ҳужжатларида белгиланган тартибда ва муддат мобайнида ҳужжатларнинг сақланишини таъминлайди.

## **11. БАНК ФАОЛИЯТИНИ НАЗОРАТ ҚИЛИШ**

95. Банкнинг молия - хўжалик фаолиятини назорат қилиш учун Ягона акциядор томонидан Тафтиш комиссияси ёки Банк Тафтишчиси (кейинги ўринларда Тафтиш комиссияси деб юритилади) тайинланиши/сайланиши мумкин. Тафтиш комиссияси бир йил муддатга ва аъзолари 3 (Уч) кишидан иборат бўлиши мумкин.

96. Банк тафтиш комиссияси аъзоларига доир малака талаблари Ягона акциядор томонидан белгиланади. Айти бир шахс Банк тафтиш комиссияси таркибига кетма-кет уч мартадан ортиқ сайланиши мумкин эмас.

97. Банк тафтиш комиссиясининг аъзолари бир вақтнинг ўзида Банк Кузатув кенгашининг аъзоси бўлиши, шунингдек Банкда меҳнат шартномаси (контракт) бўйича ишлаши мумкин эмас.

98. Банкнинг молия-хўжалик фаолиятини текшириш Тафтиш комиссиясининг, Ягона акциядорнинг, Банк Кузатув кенгашининг ташаббусига кўра бир йиллик ёки бошқа давр ичидаги фаолият яқунлари бўйича амалга оширилади.

99. Ўз функцияларини бажариш пайтида Банк Тафтиш комиссияси қуйидагиларни амалга оширади:

Банк мол - мулкани тафтишдан ўтказиш, уларни Банк молиявий

ҳужжатлари ва бирламчи бухгалтерия ҳисоби маълумотлари билан таққослаш;

Банк номидан тузилган шартномалар, амалга оширилган битимлар, контрагентлар билан ҳисоб - китобларнинг қонун ҳужжатларига мувофиқлигини текшириш;

Банкнинг молиявий ҳолатини, унинг тўловга лаёқатлилигини, активларининг ликвидлилигини, ўз ва жалб қилинган маблағлари нисбатини таҳлил қилиш, захиралар яратиш, банк бошқаруви органлари учун тавсиялар ишлаб чиқиш;

давлат солиқ ва статистика органлари, давлат бошқарув органлари учун Банк баланси, ҳисобот ҳужжатларининг тўғри тузилганлигини текшириш.

100. Банкнинг молия-ҳўжалик фаолиятини текшириш якунларига кўра Банк Тафтиш комиссияси хулоса тузади ва хулоса Ягона акциядорга тақдим этилади.

101. Банк Тафтиш комиссиясининг фаолият кўрсатиш тартиби Ягона акциядор томонидан тасдиқланадиган Низомда белгиланади.

102. Банкда ички аудит хизмати ташкил этилади. Банк ички аудит хизмати Банкнинг жорий фаолияти устидан назоратни амалга оширади. Банк ички аудит хизмати Банк Кузатув кенгашига ҳисобдордир.

103. Банк ички аудит хизмати Банк томонидан қонун ҳужжатларига, Банк Уставига ва бошқа ҳужжатларга риоя этилишини, бухгалтерия ҳисобида ва молиявий ҳисоботларда маълумотларнинг тўлиқ ҳамда ишончли тарзда акс эттирилиши таъминланишини, хўжалик операцияларини амалга оширишнинг белгиланган қоидалари ва тартиб-таомилларига риоя этилишини, активларнинг сақланишини, шунингдек банкни бошқариш юзасидан қонун ҳужжатларида белгиланган талабларга риоя этилишини текшириш ҳамда мониторинг олиб бориш орқали ишларни назорат қилади ҳамда баҳолайди.

104. Банкнинг ички аудит хизмати ўз фаолиятини қонунда белгиланадиган тартибга мувофиқ амалга оширади.

105. Банк қонун ҳужжатларида белгиланган тартибда аудиторлик ташкилотини жалб қилади.

Аудиторлик ташкилоти Банк билан тузилган шартномага мувофиқ қонун ҳужжатларида белгиланган тартибда Банк молия-ҳўжалик фаолиятининг текширилишини амалга оширади ва унга аудиторлик хулосасини тақдим этади.

106. Аудиторлик ташкилоти Банкнинг молиявий ҳисоботи ва молияга доир бошқа ахборот ҳақидаги нотўғри хулосани ўз ичига олган аудиторлик хулосаси тузилганлиги оқибатида етказилган зарар учун Банк олдида жавобгар бўлади.

107. Банкда Банк Кузатув кенгашига ҳисобдор бўлган ва корпоратив қонун ҳужжатларига риоя этилиши устидан назорат қилиш вазифасини бажарувчи Банк корпоратив маслаҳатчиси лавозими жорий этилади.

108. Банк корпоратив маслаҳатчисининг фаолияти Банк Кузатув

кенгаши томонидан тасдиқланган Низом асосида амалга оширилади.

109. Банкда манфаатлар тўқнашувининг олдини олиш Банк Ягона акциядори томонидан тасдиқланган манфаатлар қарама-қаршилиги вақтида ҳаракат қилиш тартиби тўғрисида низом асосида амалга оширилади.

## **12. БАНКНИ ҚАЙТА ТАШКИЛ ЭТИШ ВА ТУГАТИШ**

110. Банкни қайта ташкил этиш рақобат тўғрисидаги қонун ҳужжатларининг талаблари ҳисобга олинган ҳолда, Ягона акциядор қарорига мувофиқ қўшиб юбориш, қўшиб олиш, бўлиш, ажратиб чиқариш ва ўзгартириш шаклида Марказий банкнинг рухсати билан қонун ҳужжатларига мувофиқ амалга оширилади. Банкни қайта ташкил этиш Марказий банкнинг талабига биноан ҳам амалга оширилиши мумкин.

## **13. БАНК УСТАВИГА ЎЗГАРТИРИШ ВА ҚЎШИМЧАЛАР КИРИТИШ**

111. Банк Устави, шунингдек унга киритиладиган барча ўзгартириш ва қўшимчалар амалдаги қонунчиликда белгиланган тартибда қабул қилинади ҳамда Марказий банкда рўйхатга олинади.

## **14. ЯКУНЛОВЧИ ҚОИДАЛАР**

112. Ушбу Уставда назарда тутилмаган муносабатлар Ўзбекистон Республикаси “Акциядорлик жамиятлари ва акциядорлар ҳуқуқларини ҳимоя қилиш тўғрисида”ги, “Банклар ва банк фаолияти тўғрисида”ги қонунлари ва бошқа қонун ҳужжатлари билан тартибга солинади.

Кузатув кенгаши раиси

Ж.Х.Хайдаров

*Аслима тўғри*

*УХ*

